

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ সম্পাদকীয়র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৭৫/২০১৭-১৮

ঢাকা, রোববার ১৫ অক্টোবর ২০১৭, ৩০ আশ্বিন ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। আগামী নির্বাচন অবাধ ও সবার কাছে গ্রহণযোগ্য হবে : প্রধানমন্ত্রী
- ২। রোহিঙ্গাদের সামলানোই বাংলাদেশের সবচেয়ে বড় সমস্যা : ওয়াশিংটনে অর্থমন্ত্রী
- ৩। রোহিঙ্গাদের মিয়ানমারে সসম্মানে ফেরাতে হবে : জাতিসংঘ নিরাপত্তা পরিষদে কফি আনান
- ৪। মিয়ানমার সরকারের বিবৃতির সঙ্গে বাস্তবের বিস্তর ব্যবধান : জাতিসংঘে বাংলাদেশ প্রতিনিধি
- ৫। প্রধান বিচারপতির বিবৃতি বিভ্রান্তিমূলক : সুপ্রিমকোর্ট  
প্রধান বিচারপতি স্বেচ্ছায় ছুটিতে গেছেন : তথ্যমন্ত্রী  
আইনমন্ত্রীর ব্রিফিং আজ
- ৬। জিএম খাদ্যের ব্যাপারে বিজ্ঞানমনস্ক হওয়ার আহ্বান কৃষিমন্ত্রীর
- ৭। সারাদেশে বিদ্যুতের অনলাইন বিলিং সিস্টেম চালু হচ্ছে : বিদ্যুৎ প্রতিমন্ত্রী
- ৮। প্রধানমন্ত্রী শেখ হাসিনার নেতৃত্বে দেশ অর্থনৈতিকভাবে দ্রুত এগিয়ে যাচ্ছে : সংস্কৃতিমন্ত্রী
- ৯। চামড়া রপ্তানিতে আয় ২ হাজার ৬শ' কোটি টাকা
- ১০। প্রায় ২ লাখ নাগরিককে ভোটার করতে নিবন্ধন কার্যক্রম শুরু
- ১১। বাংলাদেশের ১২ লাখ মানুষ বসতি হারানোর ঝুঁকিতে : জাতিসংঘ

১। আগামী নির্বাচন অবাধ ও সবার কাছে গ্রহণযোগ্য হবে : প্রধানমন্ত্রী

প্রধানমন্ত্রী ও আওয়ামী লীগ সভাপতি শেখ হাসিনা বলেছেন, আওয়ামী লীগ জনগণের ভোটের অধিকার প্রতিষ্ঠা করেছে। গণতন্ত্রের প্রাতিষ্ঠানিক রূপ দেওয়াই আওয়ামী লীগের লক্ষ্য। আগামী (একাদশ জাতীয় সংসদ) নির্বাচন হবে অবাধ, নিরপেক্ষ ও সবার কাছে গ্রহণযোগ্য। সুষ্ঠু নির্বাচন যাতে হয় আলোচনা করে তার একটা পথ আমরা বের করব। আমরা চাই মানুষ মৌলিক ও সাংবিধানিক অধিকার প্রয়োগ করবে। যার যার প্রতিনিধি সে সে বেছে নেবে। ইতোমধ্যে আমরা একটা স্বচ্ছ ভোটার তালিকা তৈরি করতে পেরেছি। গতকাল (১৪ অক্টোবর শনিবার) গণভবনে আওয়ামী লীগের কার্যনির্বাহী সংসদ ও উপদেষ্টা পরিষদের যৌথসভায় সূচনা বক্তব্যে প্রধানমন্ত্রী শেখ হাসিনা এসব কথা বলেন। সরকারের উন্নয়ন কর্মকাণ্ড তুলে ধরে তিনি বলেন, আওয়ামী লীগ সরকার এসেছিল বলেই দেশ উন্নত হচ্ছে। পৃথিবীতে এখন বাংলাদেশ উন্নয়নের রোল মডেল। বঙ্গবন্ধুকে হত্যার মধ্য দিয়ে বাংলাদেশকে বিশ্বে যেভাবে কলঙ্কিত করা হয়েছে, তা এখন আমরা মুছতে পেরেছি। সূত্র-সংবাদ (পৃ.১,ক.৪), যুগান্তর (পৃ.১,ক.৮), ডেইলি সান (পৃ.১,ক.৬), ইন্ডিপেনডেন্ট (পৃ.১,ক.৭)।

২। রোহিঙ্গাদের সামলানোই বাংলাদেশের সবচেয়ে বড় সমস্যা : ওয়াশিংটনে অর্থমন্ত্রী

মিয়ানমারে সেনাবাহিনীর নিধনযজ্ঞের মুখে পালিয়ে আসা রোহিঙ্গাদের সামলানোকেই বাংলাদেশের সবচেয়ে বড় সমস্যা হিসেবে দেখছেন অর্থমন্ত্রী আবুল মাল আবদুল মুহিত। এর মধ্য দিয়ে মিয়ানমার বাংলাদেশের অর্থনীতিকে ধ্বংস করে দিচ্ছে বলে উপলব্ধি তাঁর। ওয়াশিংটন ডিসিতে বিশ্বব্যাংক-আইএমএফের বার্ষিক সম্মেলন চলাকালে গতকাল (১৪ অক্টোবর শনিবার) ইন্টারন্যাশনাল মনিটরি এন্ড ফাইন্যান্সিয়াল কমিটির (আইএমএফসি) বৈঠকশেষে রোহিঙ্গাদের নিয়ে এ প্রতিক্রিয়া জানান অর্থমন্ত্রী। সূত্র-জনকণ্ঠ (শেষ,ক.৪), সংবাদ (শেষ পৃ.,ক.১)।

অর্থমন্ত্রী আবুল মাল আবদুল মুহিত বলেছেন, ২০২০ সালে দেশে নতুন ভ্যাট আইন কার্যকর করবে সরকার। আর এতে দু'টি ভ্যাট স্তর নির্ধারণ করা হবে। আন্তর্জাতিক মুদ্রা তহবিল আইএমএফের ডিএমডি মিটসুহিরো ফুরুসাওয়াকে এসব তথ্য জানান অর্থমন্ত্রী। এছাড়া আইএমএফের পক্ষ থেকে রেমিটেন্স প্রবাহ কমে যাওয়ার প্রভাব সম্পর্কে জানতে চাইলে অর্থমন্ত্রী বলেন, প্রবাহ বাড়াতে শীঘ্রই বিনা খরচে রেমিটেন্স পাঠানোর ব্যবস্থা করছে সরকার। সূত্র-জনকণ্ঠ (পৃ.১৮,ক.৮), সংবাদ (পৃ.১৩,ক.৪)।

৩। রোহিঙ্গাদের মিয়ানমারে সসন্মানে ফেরাতে হবে : জাতিসংঘ নিরাপত্তা পরিষদে কফি আনান

পালিয়ে আসা রোহিঙ্গাদের মর্যাদার সঙ্গে রাখাইনে ফিরিয়ে নিতে হবে। দেশে ফেরার পর তাদের কোনো অস্থায়ী আশ্রয় শিবিরে রাখা যাবে না, বরং নিজেদের বাড়িঘরে নিরাপদে থাকার ব্যবস্থা করতে হবে। আর এসব করার জন্য প্রয়োজনীয় সব ব্যবস্থা মিয়ানমারকেই নিশ্চিত করতে হবে। জাতিসংঘে নিরাপত্তা পরিষদের অনির্ধারিত রুদ্দদ্বার বৈঠকে গত ১৩ অক্টোবর শুক্রবার এসব বলেছেন বিশ্ব সংস্থাটির সাবেক মহাসচিব কফি আনান। রোহিঙ্গা সংকট উত্তরণে ঐকমত্যের ভিত্তিতে একটি রোডম্যাপ প্রণয়ন এবং মিয়ানমারের ওপর এসব ব্যাপারে কার্যকর চাপ প্রয়োগের জন্য নিরাপত্তা পরিষদের উদ্দেশ্যে জোর তাগিদ দিয়ে তিনি আরো বলেন, অন্যথায় পরিস্থিতি হবে ভয়াবহ। সূত্র-ভোরের কাগজ (পৃ.১,ক.৬), সংবাদ (পৃ.১,ক.১), ডেইলি সান (পৃ.১,ক.১), নিউজ টুডে (পৃ.১,ক.৫)।

৪। মিয়ানমার সরকারের বিবৃতির সঙ্গে বাস্তবের বিস্তর ব্যবধান : জাতিসংঘে বাংলাদেশ প্রতিনিধি

রাখাইনের পরিস্থিতি নিয়ে মিয়ানমার সরকারের বিবৃতি ও বাস্তব পরিস্থিতির মধ্যে বিস্তর ব্যবধান আছে বলে মনে করে বাংলাদেশ। জাতিসংঘে নিযুক্ত বাংলাদেশের স্থায়ী প্রতিনিধি ও রাষ্ট্রদূত মাসুদ বিন মোমেন জাতিসংঘের এক উচ্চপর্যায়ের বৈঠকে এ প্রতিক্রিয়া জানিয়েছেন। গত ১৩ অক্টোবর শুক্রবার নিউইয়র্কে (বাংলাদেশ সময় রাত ১টা) রোহিঙ্গা পরিস্থিতি নিয়ে জাতিসংঘ সদরদফতরের ইকোসোক চেম্বারে জাতিসংঘ নিরাপত্তা পরিষদের সদস্যরা সভায় অংশ নেন। এ সভার আয়োজন করে ব্রিটিশ ও ফরাসি ডেলিগেশন। সূত্র-সংবাদ (পৃ.১,ক.৫), যুগান্তর (পৃ.১৪,ক.৩)।

৫। প্রধান বিচারপতির বিবৃতি বিভ্রান্তিমূলক : সুপ্রিমকোর্ট  
প্রধান বিচারপতি স্বেচ্ছায় ছুটিতে গেছেন : তথ্যমন্ত্রী  
আইনমন্ত্রীর ব্রিফিং আজ

ছুটিতে থাকা প্রধান বিচারপতি সুরেন্দ্রকুমার সিনহার বিরুদ্ধে দুর্নীতি, বিদেশে অর্থ পাচার, আর্থিক অনিয়ম, নৈতিক স্বলনসহ সুনির্দিষ্ট ১১টি অভিযোগ থাকার কথা জানিয়েছে সুপ্রিমকোর্ট। গতকাল (১৪ অক্টোবর শনিবার) সুপ্রিমকোর্টের বিবৃতিতে বলা হয়েছে, প্রধান বিচারপতির বিবৃতি বিভ্রান্তিমূলক। বিবৃতিতে আরও বলা হয়, প্রধান বিচারপতির পদটি একটি প্রতিষ্ঠান। সেই পদের ও বিচার বিভাগের মর্যাদা সম্মুত রাখার স্বার্থে এর আগে সুপ্রিমকোর্টের তরফ থেকে কোনো ধরনের বক্তব্য বা বিবৃতি প্রদান করা হয়নি। কিন্তু উদ্ভূত পরিস্থিতির পরিপ্রেক্ষিতে বিবৃতিটি দেওয়া হলো। সূত্র-ইন্ডেফাক, জনকণ্ঠ, প্রথম আলো, ডেইলি সান অবজারভার, নিউজ টুডেসহ অধিকাংশ পত্রিকা এ বিষয়টিতে লিড নিউজ ছেপেছে।

তথ্যমন্ত্রী হাসানুল হক ইনু বলেছেন, প্রধান বিচারপতি স্বেচ্ছায় ছুটিতে গেছেন। তিনি কখন কোন মামলার রায় দেবেন এ ব্যাপারে সরকার কখনো হস্তক্ষেপ করে না এবং হস্তক্ষেপ করার এখতিয়ারও রাখে না। এ ব্যাপারে যে প্রচারণা রয়েছে তা ভ্রান্ত। গতকাল (১৪ অক্টোবর শনিবার) কুষ্টিয়া সার্কিট হাউসে দলীয় নেতাকর্মীদের সঙ্গে মতবিনিময়কালে এসব কথা বলেন তথ্যমন্ত্রী। প্রধান বিচারপতি সুরেন্দ্রকুমার সিনহার বক্তব্যের আনুষ্ঠানিক প্রতিক্রিয়া জানাবেন আইনমন্ত্রী আনিসুল হক। আজ ১৫ অক্টোবর রোববার সচিবালয়ে এ ব্যাপারে আনুষ্ঠানিক ব্রিফিং করবেন তিনি। সূত্র-ভোরের কাগজ (শেষ পৃ.,ক.৫), যুগান্তর (পৃ.১৫,ক.২), মানবকণ্ঠ (পৃ.১,ক.৫), নিউ নেশন (শেষ পৃ.,ক.৪), অবজারভার (পৃ.৩,ক.৩)।

৬। জিএম খাদ্যের ব্যাপারে বিজ্ঞানমনস্ক হওয়ার আহ্বান কৃষিমন্ত্রীর

কৃষিমন্ত্রী মতিয়া চৌধুরী বলেছেন, বাংলাদেশের অর্থনীতির মূলভিত্তি হলো কৃষি। কৃষির পাশাপাশি আমাদের শিল্পসহ অন্যান্য ক্ষেত্রগুলোও বাংলাদেশের অগ্রগতিতে ভূমিকা রেখেছে। এ কারণেই বাংলাদেশ আজ সারাবিশ্বের দৃষ্টি আকর্ষণ করতে পেরেছে। আর এটি সম্ভব হয়েছে প্রধানমন্ত্রী শেখ হাসিনার সুচিন্তিত ও সুদৃঢ় নেতৃত্বের কারণে। মন্ত্রী গতকাল (১৪ অক্টোবর শনিবার) সারাদেশ থেকে আগত কৃষি বিশেষজ্ঞসহ বিজ্ঞানীদের অংশগ্রহণে গাজীপুরে ছয়দিনব্যাপী বাংলাদেশ কৃষি গবেষণা ইনস্টিটিউট এর ‘কেন্দ্রীয় গবেষণা পর্যালোচনা ও কর্মসূচি প্রণয়ন কর্মশালা-২০১৭’ এর উদ্বোধন অনুষ্ঠানে প্রধান অতিথির বক্তব্যে এসব কথা বলেন। তিনি হাইব্রিড ও জিএম খাদ্যের ব্যাপারে সবাইকে আরও উদার ও বিজ্ঞানমনস্ক হওয়ার আহ্বান জানান। এছাড়াও তিনি দেশীয় জাতসমূহের ফলন বাড়ানোর জন্য বিজ্ঞানীদের পরামর্শ দেন। তিনি ভুট্টার উৎপাদন বৃদ্ধির জন্যও গুরুত্বারোপ করেন। এর আগে মন্ত্রী বিভিন্ন প্রদর্শনী ও জাত পরিদর্শন করেন। সূত্র-জনকণ্ঠ (পৃ.৩,ক.৬), সংবাদ (পৃ.৪,ক.১)।

৭। সারাদেশে বিদ্যুতের অনলাইন বিলিং সিস্টেম চালু হচ্ছে : বিদ্যুৎ প্রতিমন্ত্রীর

বিদ্যুৎ, জ্বালানি ও খনিজসম্পদ প্রতিমন্ত্রী নসরুল হামিদ বলেছেন, সারাদেশে বিদ্যুতের অনলাইন বিলিং সিস্টেম চালু করা হচ্ছে। অনলাইন বিলিং সিস্টেম চালু করা হলে বিদ্যুৎ বিল নিয়ে কোনো ভোগান্তি থাকবে না, থাকবে না কোনো সিস্টেম লস। এ সিস্টেমে ঘরে বসে মোবাইল ফোনেও বিদ্যুৎ বিল দেওয়া যাবে। গতকাল (১৪ অক্টোবর শনিবার) ঢাকা পল্লিবিদ্যুৎ সমিতি-৪ আয়োজিত এক অনুষ্ঠানে প্রধান অতিথির বক্তব্যে তিনি এসব কথা বলেন। এ সময় তিনি সুইচ টিপে ঢাকা পল্লিবিদ্যুৎ সমিতি-৪-এর অফিস, বহুতল ভবন, চারটি ৩৩/১ কেভি ২০ এমভিএ উপকেন্দ্রের ভিত্তিপ্রস্তর ও একটি উপকেন্দ্রের উদ্বোধন করেন। সূত্র-সমকাল (পৃ.৫,ক.৪), ইন্ডিপেন্ডেন্ট (পৃ.২,ক.১)।

৮। প্রধানমন্ত্রী শেখ হাসিনার নেতৃত্বে দেশ অর্থনৈতিকভাবে দ্রুত এগিয়ে যাচ্ছে : সংস্কৃতিমন্ত্রীর

সংস্কৃতিমন্ত্রী আসাদুজ্জামান নূর বলেছেন, প্রধানমন্ত্রী শেখ হাসিনার নেতৃত্বে আমরা অর্থনৈতিকভাবে দ্রুত এগিয়ে যাচ্ছি। যার প্রমাণ আমাদের উত্তরাঞ্চলে একসময় মঙ্গার উপদ্রব ছিল, আজ আর তা নেই। আর উন্নয়ন তখনই টেকসই হবে, যখন আমরা মানবিক উন্নয়ন ঘটাতে সক্ষম হব। গতকাল (১৪ অক্টোবর শনিবার) রাজধানীতে বাংলাদেশ মহিলা সমিতির প্রতিষ্ঠাতা সভানেত্রী শিক্ষাবিদ ড. নীলিমা ইব্রাহিমের ৯৬তম জন্মউৎসব উদ্‌যাপন উপলক্ষে আয়োজিত স্মারক বক্তৃতা ও সাংস্কৃতিক অনুষ্ঠানে প্রধান অতিথির বক্তৃতায় তিনি এসব কথা বলেন। সূত্র-যুগান্তর (পৃ.১৮,ক.২), ইন্ডেফাক (পৃ.৪,ক.৬)।

৯। চামড়া রপ্তানিতে আয় ২ হাজার ৬শ' কোটি টাকা

দেশে চামড়া ও চামড়াজাত পণ্য রপ্তানিতে আয় বেড়েছে। চলতি ২০১৭-১৮ অর্থবছরের প্রথম তিন মাসে চামড়া ও চামড়াজাত পণ্য রপ্তানিতে আয় হয়েছে ৩২ কোটি ৪৬ লাখ মার্কিন ডলার বা ২ হাজার ৬০০ কোটি টাকা। যা গত অর্থবছরের (২০১৬-১৭) এ সময়ের তুলনায় ১ দশমিক ৭৪ শতাংশ বেশি। বাংলাদেশ রপ্তানি উন্নয়ন ব্যুরোর জুলাই-সেপ্টেম্বর মাসের হালনাগাদ প্রতিবেদনে এ তথ্য প্রকাশ করা হয়। সূত্র-সংবাদ (পৃ.১৩,ক.১), জনকণ্ঠ (পৃ.১৮,ক.১)।

১০। প্রায় ২ লাখ নাগরিককে ভোটার করতে নিবন্ধন কার্যক্রম শুরু

রাজধানীর দুই সিটি করপোরেশনে বাড়ি বাড়ি গিয়ে তথ্য সংগ্রহ করা প্রায় ২ লাখ নাগরিককে ভোটার করতে নিবন্ধন কার্যক্রম শুরু করেছে নির্বাচন কমিশন। এ লক্ষ্যে নির্ধারিত কেন্দ্রে তাদের ছবি উত্তোলন, দুই হাতের আঙ্গুলের ছাপ নেওয়া এবং চোখের আইরিশ স্কেন করার কাজ চলছে। তথ্য গ্রহণের সময় যারা বাদ পড়েছেন, তারাও এলাকাভিত্তিক নির্ধারিত কেন্দ্রে গিয়ে সরাসরি নিবন্ধন করতে পারবেন। এজন্য নির্দিষ্ট কিছু কাগজপত্র সঙ্গে নিতে হবে। রাজধানীর ১২৭টি কেন্দ্রে গতকাল (১৪ অক্টোবর শনিবার) থেকে শুরু হওয়া নিবন্ধন কার্যক্রম চলবে ৫ নভেম্বর পর্যন্ত। সূত্র-সংবাদ (পৃ.১,ক.৬), নিউজ টুডে (শেষ পৃ.,ক.৫), অবজারভার (শেষ পৃ.,ক.৪)।

১১। বাংলাদেশের ১২ লাখ মানুষ বসতি হারানোর ঝুঁকিতে : জাতিসংঘ

বিভিন্ন ধরনের প্রাকৃতিক দুর্যোগে প্রতিবছর প্রায় এক কোটি ৪০ লাখ মানুষ গৃহহারা হচ্ছে। এর মধ্যে বাংলাদেশের ১২ লাখ মানুষও বসতি হারানোর ঝুঁকিতে রয়েছে। 'আন্তর্জাতিক দুর্যোগ প্রশমন দিবস' উপলক্ষে গত ১৩ অক্টোবর শুক্রবার জাতিসংঘ উদ্বোধনক এ তথ্য প্রকাশ করেছে। যৌথভাবে এ জরিপ পরিচালনা করেছে জাতিসংঘ দুর্যোগ ঝুঁকি প্রশমন দপ্তর এবং নরওয়ে রিফিউজি কাউন্সিলের অভ্যন্তরীণ গৃহহারাদের পুনর্বাসন সম্পর্কিত মনিটরিং সেন্টার। সূত্র-সমকাল (পৃ.৩,ক.২)।

সম্পাদকীয়

- ক. সমকাল : দেশের প্রাচীনতম বিশেষায়িত হাসপাতাল পাবনা মানসিক হাসপাতালের অবকাঠামো ও জনবল সংকট দূর করার সুপারিশ।
- খ. ভোরের কাগজ : চট্টগ্রাম থেকে কুরিয়ারে আসা ৩০ হাজার ইয়াবার একটি বড় চালান ধরা পড়ায় উদ্বিগ্ন প্রকাশ করে রোহিঙ্গাদের এক্ষেত্রে সংশ্লিষ্টতার সম্ভাবনা থাকায় বাংলাদেশে অনুপ্রবেশের সময় তাদের তল্লাশির ওপর গুরুত্বারোপ।
- গ. ইত্তেফাক : পুলিশ সদস্যদের জন্য ভর্তুকি মূল্যে দেওয়া চাল ও গমের মান খারাপ হওয়ার কথা উল্লেখ করে তাদের যথাযথ মানের খাবার সরবরাহের আহ্বান।
- ঘ. প্রথম আলো : সরকার ও বিভিন্ন এনজিও ব্যাপক জনসচেতনতামূলক কার্যক্রম গ্রহণ করলেও বাল্যবিবাহ হয়েই চলছে উল্লেখ করে এ ব্যাপারে সমাজের সকলকে সচেতন হওয়ার আহ্বান।
- ঙ. ইন্ডিপেন্ডেন্ট : অতিথি পাখি শিকার ও বিক্রির সাথে জড়িতদের বিরুদ্ধে আইনি ব্যবস্থা নেওয়ার সুপারিশ।
- চ. ডেইলি সান : সাভারের ট্যানারি পল্লিতে সিইটিপি এখনও চালু না হওয়ায় কারখানা মালিকরা ধলেশ্বরী নদীতে চামড়ার বর্জ্য ফেলায় বুড়িগঙ্গার মতো ধলেশ্বরী নদীও দূষণে হুমকির মুখে পড়ার আশঙ্কা করে এ ব্যাপারে দ্রুত কার্যকর পদক্ষেপ নেওয়ার আহ্বান।
- ছ. নিউজ টুডে : নতুন উদ্ভাবিত বিরি-৮১ জাতের ধান উচ্চ ফলনশীল ও উচ্চ মানসম্পন্ন হওয়ায় এ ধানের চাষ বাড়ানোসহ আবহাওয়ার বিরূপ প্রভাব সহিষ্ণু আরও নতুন জাতের শস্যের উদ্ভাবন ও ফসল ফলানোর ওপর গুরুত্বারোপ।
- জ. নিউ নেশন : রাজধানী ঢাকা ভূমিকম্পের ঝুঁকিতে থাকায় এখানকার ভবনগুলো ভূমিকম্প সহিষ্ণু করে গড়ে তোলার আহ্বান।
- ঝ. নিউ এজ : জনস্বার্থে অনিবন্ধিত ওষুধের বাজার নিয়ন্ত্রণে আনার সুপারিশ করে সম্পাদকীয় প্রকাশ।

=৫=

উপসম্পাদকীয়

সমকাল পত্রিকায় প্রকাশিত কলামে উল্লেখ করা হয়েছে, শিশুদের অধিকার যথাযথভাবে নিশ্চিত করতে হবে।

নিবন্ধ ও ফিচার

ইত্তেফাক পত্রিকায় প্রকাশিত 'শিশু নিপীড়ন প্রতিরোধে এগিয়ে আসুন' শিরোনামের নিবন্ধে অভিমত প্রকাশ করা হয়েছে, শিশু নির্যাতনের কারণগুলো বের করে তার সমাধানে রাষ্ট্রের সর্বস্তরের মানুষের এগিয়ে আসা উচিত।

#

খাদীজা/ফাহিমা/মরজিনা/সাদ্দা/তানিয়া/২০১৭/৯.০০